

Im Rothus obe hends schiints bschlosse
Mer nimmts zor Kenntnis, fascht mit Rüebrig
Jetzt werd au s'Südquartier erschlosse
es gäb e grösseri Underfüehrig.
S'isch klar, wie 2 mal 2 isch vier
De gröschti Tubel mues das gseh
die piffed doch uf's s'Südquartier –
s'isch alles wäg de PTT.

De Waxel Mirz hätt demissioniert
und bald stönds ohni Leitig do
Drü neu hends scho uusprobiert
Schiints lösed's no en vierte cho
s'goht nümme lang, hend's d'Operette
und die i ihrem Grössewahn
tünd giegele, du chöndsch fascht wette
nur underem Herbert Karajan.

Bim Läse han i überleit
Das sig vielleicht en Schnitzer gsi –
Doch Rudl'-Ralla hamer g'seit
Hüt mues mer doch flexibel si.
Dä Tenuefz mit de Partei
Da tuet em Wählerstimme choschte –
Drum isch de Kandidat so frei
und goht i d'Migro s'Holz go poschte.
Dem seit me Ämtlifressertick
Üs Wähler haut das uf de Wecker
Dä isch i Sache Politik
en regelrechte Doppelstecker.

Denn simmer ehrlich, s'isch doch so
wie wönd die Planer üs verstoh
Die wönded uf de Bonzealp
und mached mit üs Chline s'Chalb
uf ihres Huus schiint d'Sunne druff
Wo wönded mir? Im City-Puff!

E Gmeindrotsitzig find ich toll
was die nöd all's z'bespreche hend
ich han hüt s'Sitzungsprotokoll
i Sache «Saalbau» i de Händ:

De Wechsi schickt de Stigeli us
er söll es Plänli woge!
Stigeli wött keis Plänli woge –
er tuet lieber Meiteli ploge –
– alles bliibt bim alte.

De Wechsi schickt de Lehrer us
er söll em eis diktire
Lehrerli wött nöd diktire
lieber Mühleli installiere
Stigeli tuet Meiteli ploge
– alles bliibt bim alte.

Do schickt de Wechsi s'Bölleli us
er söll go kommandiere
Bölleli tuet nöd kommandiere
er tuet lieber Brief frankiere
De Lehrer s'Mühleli installiere
Stigeli tuet Meiteli ploge
– alles bliibt bim alte.

nackelet im Bluemegarte
s'Lüdeli tuet Iseli büüge
Brönschi tuet halt gern plagiere
Trübeli mues zerscht selber riife
s'Bölleli mues Brief frankiere
s'Lehrerli Mühleli installiere
Stigeli tuet Meiteli ploge
– alles bliibt bim alte.

Jetzt schickt de Wechsi s'Schöneli us
er söll ne eis verpasse
s'Schöneli tuet nöd verpasse
suscht verpasst er denn no s'Jasse
s'Titeli isch im Bluemegarte
s'Lüdeli tuet Iseli büüge
Brönscheli tuet halt gern plagiere
Trübeli mues zerscht selber riife
s'Bölleli mues Brief frankiere
s'Lehrerli Mühleli installiere
Stigeli tuet Meiteli ploge
– alles bliibt bim alte.

Jetzt zücht de Wechsi selber us
und hofft er find' ellei de Rank
Chum das er weg, chunsch nümme drus
do seit en jede: Gott sei Dank!
Wenn er wör go, hett's keine z'wenig
s'gäb au bestimmt kei Hysterie
s'brucht nöd emol e Neuernennig
s'wör höchstens eine weniger si.

z'erscht hetts mi us de Socke g'haue –
denn han i Halleluja gschraue –
e grosses Wunder isch passiert –
de Meili hett de Diensch quittiert.

Und will mer grad bim Meili sind
s'git nomol en Charaktergrind
das isch au sonen flotte Typ
de liebi gueti Hilfspolyp
Hüt wömmmer gar nüt vonem schriibe
De mues jo s'Johr dur immer liide
Denn öppe ein seit, wa wötsch mache,
de arm Cheib, de isch nöd ganz bache.

Das wär för das Johr d'Bulle gsi
Jetzt fällt mer s'Wilerlied no i
s'git schöni Länder, grosse Städt
und Dörfer chli gar viel
doch s'gröschti Güllezonkaff
isch üses Städtli Wil.

FGW



wehrli metallbau
9500 Wil Nelkenstrasse 13
Telefon 073 - 23 23 51

Metallbau
Leichtmetallbau
Kunststoff-Fenster